

1621

21^e Fev. 1712.

1073

PROTESTATIONS

des habitans de la Ville
de la Rochelle, au Roy.



A LA ROCHELLE,

Par Pierre Pied-de-dieu.

M. DC. XXI.

Case

F

39

326

1621 pro

PROTESTATIONS DES
habitans de la Ville de la Rochelle,
au Roy.

SIRE,

C'est vne coustume transmise de siecle en siecle, & qui a esté tousiours obseruée par nos deuanciers vos plus fideles subjets & seruiteurs, de reconfirmer de plus en plus le serment de l'affection & seruice que nous deuons tous vnanimement à vostre Majesté, principalement lors qu'il semble se soufleuer quelque diuisions en vostre Royaume.

C'est pourquoy Sire, que ne voulant enfraindre ny tenir la borne de la bonne reputation qu'ont tousiours eue les Habitans de vostre ville de la Rochelle, que d'auoir eu ce bon-heur que d'estre estimez de vostre Majesté mesme, pour bons & fidelles seruiteurs de leur Roy, & en ceste qualité, Sire, ils desirent viure & mourir, ne recognoissant apres Dieu

autre auquel ils doiuent obeir, que vo^r Si-
re, qui nous auez esté donné de la Maje-
sté Diuine pour nous regir & comman-
der icy bas, comme vn Pere à ses Enfans,
car le Pere ne commande rien qui ne
soit pour le bien de ses Enfans.

Pour cette cause Homere appelloit
Iupiter Pere des Dieux & des hommes,
conformement au dire de nostre Sei-
gneur, qui nous enseigne d'appeller le
Souuerain Monarque, & que Dieu E-
ternel nostre Pere, & non point nostre
Roy & nostre Seigneur, nous ensei-
gnans que la vraye domination est celle
qui ressemble aux peres & les vrais su-
jects ceux qui ressemblent aux enfans.

Vostre Majesté, Sire, nous la tenons
comme semblable à la Diuinité, laquelle
par sa prouidence eternelle regne seule
sur tout le monde: & si cela est cōfor-
me & approchant de nostre nature, en
laquelle nous voyons vn qui domine
par dessus les autres, nous regardons no-
stre corps, il est maistrisé d'une ame qui

dōne mouuement à tous les membres :
fans laquelle le corps n'est qu'une sou-
che entre les membres : nous auons le
cœur qui est le principal & comme le
Roy : en la partie de l'esprit la raison do-
mine.

Rome ne peut auoir deux freres re-
gnant ensemble , ainsi les habitans de
vostre ville de la Rochelle, Sire, durant
vostre regne (qu'ils prient la Majesté di-
uine qu'il soit & continuë d'heureuse &
longues annees) ils protestent de ne re-
cognoistre autre personne que vostre
Majesté, pour les regir & commander,
pour laquelle ils veulent consommer
leurs vies & moyens, en executant les
commandemens d'icelle.

Il n'y auroit apparence aucune qu'ils
fussent autres, veu que iournellement
ils reçoient de vos benignes grâces, &
dont ils vous sont grandement obligez,
Et quant bien cela ne seroit, il leur est
commandé de Dieu tres-expressement
d'obeir à leur Roy, de quelque humeur

qu'il soit, Comme estant vne sacrée personne qui n'a aucun pair en son Royau-
me, & n'y prendre aucune cognoissance
de cause de ses actions, ains seulement
de luy estre fidelle & obeir à ces loix &
ordonnances telles qu'elles soient.

Et combien, Sire, doiuent ils estre ob-
ligez à vostre Majesté, veu que l'on n'y
a iamais remarqué que de la clemence,
car pour ne mander des exemples ail-
leurs on verra en icelle, non pas brochee
à l'esguille, mais tainctes en cramoisi
toutes les vertus Chrestiennes qui peu-
uent accomplir vn heureux & magna-
nime Prince.

Mais pource que vostre Majesté por-
te le plus heureux nom qui fut iamais en
nostre France, elle y verra particuliere-
ment les marques des vertus & genero-
sité de dix ou douze Louys puissans &
iuste Roys, qui luy ont frayé le chemin à
l'immortalité: la debonnaireté de Louys
le premier, le zele du second, la candeur
du troisieme, la iustice du quatriesme, la

fortune du six, la generosité du sept, la moderation & continence du huiet, la saincteté du neuf, la constance du dix, la prudence de l'onze, & la bonté du douze, & ny manquera l'espace pour grauer en belle lettre d'or pour l'accomplissement de ces vertus, la felicité du treziesme, pour lequel nous prions de rechef la toute puissance Diuine de le nous conseruer, puissiez vous à iamais croistre en gloire, comme les Cedres du Liban, & que vostre Majesté soit exaltee iusque au siecle aduenir.

Fasse cependant Dieu, le Dieu de paix que nos esprits estant arrestez fermes en tranquillité & nos cœurs portez à l'obeyssance que nous vous deuons, la France aprestant de penible traualx qu'elle a surmonté, sente pour iamais l'air de ses aisles sur son oraison, & que V. M. esleuant les branches de l'Oliuier au dessus les rameaux de la palme, vous donne le moyen d'acquérir de plus en plus ce glorieux tiltre de conquerant &

touſiours eſtre victorieux que vos peuples ravis d'admiration rempliſſe le Ciel & la terre de ſouhairs, que ce grand Soleil de nos iours luiſe touſiours & ne racourciſſe iamais ſes ombres de là l'Orient au couchant, puis que nous ne ſouhaitons que voſtre felicité infinie.

Et quant au ſerment que tres humblement nous proteſtons tous vnanimement aupres de voſtre Maieſté de vous eſtre tres-affectionnez fidelles ſubjects & ſeruiteurs, nous ſeruira de fer & de charruë, pour faire vn profond ſeilon dedans nos ames, nous faiſant labourer ſi droit en nos deuoirs, ſans flechir ny à droit ny à gauche, que rien au mode ne nous pourra corrompre de la fidelité que nous deuons à voſtre Maieſté.

Et au lieu de ſimple parolle pour faire paroître les effets de nos promeſſes, nous ſupplions voſtre tres-Chreſtienne Maieſté agreer que vos tres-humbles ſubjects proſternez aux pieds de voſtre extreme bonté, comme au bien-facteur

de tous les François , nous vous déclarons les pures & sinceres conceptions de nos ames, sur toutes les occurences qui pourroient suruenir en vostre Royaume.

Vous asseurant aussi, Sire, que tout ce qui sera de nos forces & moyens vous sera Religieusement consacrer pour vostre seruice, & qu'en ceste candeur nous supplions le grand Roy des Roys, Tuteur & protecteur des puissances souveraine, qu'il vous conserue, comme l'objet de son amour , les delices de son amour, les delices de son peuple, & toutes autres benedictiōs lesquelles de bon subiects peuuent & doiuent pieusement souhaiter à vostre Chrestienne Majesté.

Ce sont, Sire, les protestations que font les habitans de vostre ville de la Rochelle en offrant à vostre Majesté la confirmation de leur fidelité, seruice, obéissance, & pour luy desirer tout ce qui peut accompagner l'heur & la felicité du plus grand Roy du monde.

F I N.